

四庫全書

史部

欽定四庫全書

史部

陝西通志卷八十一

詳校官監察御史<sub>臣</sub>劉涓

檢討<sub>臣</sub>德生覆勘

總校官降調編修<sub>臣</sub>倉聖脉

校對官中書<sub>臣</sub>高 中

謄錄監生<sub>臣</sub>梁鳴岐

欽定四庫全書

陝西通志卷八十一

紀事第六

後梁

太祖開平二年夏六月蜀師岐師晉師攻雍州招討劉知俊拒却之

蜀遣將將兵會岐兵五萬攻雍州晉張承業亦將兵應之六月劉知俊為西路行營都招討使以拒之知

俊及佑國節度使王重師大破岐兵於幕谷晉蜀兵皆引歸

通鑑

開平二年六月丙辰邠岐來寇芟害禾稼

結營自固踰月同州劉知俊引所部兵擊退襲至幕谷大破之俘斬千計收其生口器甲宋文通僅以身

免

冊府元龜

秋九月同州劉知俊來獻捷

開平二年九月同州劉知俊以郿延歸降將十人并

捷表來獻

冊府元龜



冬十月華原賊溫韜發唐諸陵

韜少為盜後事李茂貞為華原鎮將唐諸陵在其境  
內者悉發掘之取其所藏金寶昭陵最固韜從埏道

下見宮室制度閎麗不異人間中藏前世圖書鍾王

筆迹紙墨如新韜悉取之惟乾陵風雨不可發

五代史溫

韜傳按華原故  
城在今耀州境內

三年春二月取岐州邠州三月取丹州四月取延州坊

州

保塞節度使劉萬子暴虐失衆心且謀貳於梁李繼  
徽使牙將李延實殺之據延州指揮使高萬興與弟  
萬金以其衆數千人詣劉知俊降岐王置翟州於鄜  
城其守將亦降三月帝發步騎會萬興兵取丹延丹  
州刺史崔公實降四月劉知俊移軍攻延州李延實  
嬰城自守知俊遣白水鎮使劉儒分兵圍坊州知俊  
克延州延實降岐王所署保大節度使李彥博坊州  
刺史李彥昇皆棄城奔鳳翔鄜州都將嚴弘倚舉城

降梁以高萬興為保塞節度使牛存節為保大節度使遂命知俊乘勝取邠州知俊難之辭以闕食乃召

還

通鑑

夏四月帝如朝邑

開平三年四月壬寅車駕巡於朝邑縣界焦黎店冀

王友謙及崇政內諸司使扈從

冊府元龜

五月殺佑國軍節度使王重師以劉捍鎮長安

王重師鎮長安數年梁主怒其貢奉不時以劉捍為

留後捍至長安重師不為禮捍譖之云與邠岐通賜

自盡夷其族

通鑑

六月劉知俊以同州叛降於岐

知俊功益高太祖性多猜忌屢殺諸將王重師無罪  
見殺知俊益懼不自安太祖已下鄜坊遣知俊攻邠  
州知俊以軍食不給未行太祖幸河中使宣徽使王  
殷召知俊其弟知浣遣人告知俊以不宜來知俊遂  
叛臣於李茂貞以兵攻雍華執劉捍送於鳳翔太祖

使人謂知俊曰朕待卿至矣何相負耶知俊報曰王重師不負陛下而族滅臣非背德但畏死爾太祖復使語曰朕固知卿以此吾誅重師乃劉捍悞我致卿至此吾豈不恨之耶今捍已死未能塞責知俊不報以兵斷潼關太祖遣劉鄩牛存節攻知俊知俊遂奔

於茂貞

五代史劉知俊傳

丹州軍亂秋七月克丹州

開平三年六月乙卯丹州軍亂逐其刺史宋知誨秋

七月乙丑克丹州執其首惡王行思

五代史梁太祖紀

商州軍亂

七月商州軍亂逐其刺史李稠稠奔於岐

五代史梁太祖紀

商州刺史李稠驅士民西走將吏追斬之推押牙李

玫主州事

通鑑

八月詔同華雍等州招諭逆黨

八月制左馮翊背叛元惡遁逃朕聞相濟之徒多是

脅從之輩若能迴心向國轉禍全身當與加恩必不

問罪仍令同華雍等州切加招諭如能梟斬溫韜或以鎮寨歸化必加厚賞仍獎官班兼委本界招復人

戶切加安存

冊府元龜

九月延州刺史高萬興請增兵禦敵

高萬興為延州刺史開平三年九月奏邠鳳賊百騎

至韓家寨廊州請添兵於本佛寨犄角備禦

冊府元龜

冬十月康懷貞等及劉知俊戰於昇平敗績

岐王欲取靈州以處劉知俊使自將兵攻之朔方節

度使韓遜告急詔康懷貞寇彥卿將兵攻邠寧以救之知俊聞之解還帝急召懷貞等遣兵迎援於三原青谷懷貞等還至三水知俊據險邀之左龍驤軍使王彥章力戰懷貞等乃得過懷貞與裨將李德遇等分道而行皆與援兵不相值至昇平唐天寶十二載分宜君縣置昇縣知俊伏兵山口懷貞大敗僅以身免德遇等軍皆

沒

鑑通

四年春三月夏州亂殺節度使李彝昌



夏州都指揮使高宗益作亂殺節度李彝昌將吏共誅宗益推彝昌族父李仁福為帥仁福以聞四月以仁福為定難節度使

通鑑

秋七月岐人晉人攻夏州遣兵拒却之

岐王遣使告晉請合兵攻定難節度使李仁福晉王遣周德威將兵會圍夏州梁主恐晉兵襲西京遣兵

屯三原遣李遇邀其歸路岐晉兵皆解去

綱目

乾化元年春三月溫韜攻長安康懷貞等擊走之

岐王募華原賊帥溫韜以為假子於華原美原置義  
勝軍以韜為節度使使帥邠岐兵寇長安詔感化節  
度使康懷貞忠武節度使牛存節以同華河中兵討  
之懷貞等奏擊韜於車度

車度地名在長安北同州界

走之

通鑑

夏四月岐攻興元蜀兵擊卻之

蜀主之女普慈公主嫁岐王從子繼崇繼崇驕矜嗜  
酒蜀主召公主歸寧留之岐王怒始與蜀絕至是岐  
王聚兵寇蜀興元唐道襲擊却之

綱目

秋八月岐劉知俊擊蜀兵戰於青泥嶺敗之圍安遠軍  
岐王使劉知俊李繼崇將兵擊蜀王宗侃王宗賀唐  
道襲王宗紹與之戰於青泥嶺蜀兵大敗王宗浩奔  
興州溺死於江唐道襲奔興元先是王宗綰城西縣  
號安遠軍宗侃等收散兵走保之知俊繼崇追圍之

通鑑

蜀岐戰於興元岐師敗績

蜀王宗弼王宗播再敗岐兵蜀主如興元安遠軍望

其旗王宗侃等鼓譟而出與援軍夾攻岐兵大破之  
拔二十一寨斬其將李廷志等岐兵解圍遁去唐道  
襲先伏兵於斜谷邀擊又破之岐王左右讒劉知俊  
岐王奪其兵李繼崇曰知俊壯士窮來歸我不宜以  
讒廢之知俊舉族居於秦州

綱目

十二月高萬興敗岐兵於邠州

十二月延州節度使高萬興奏領軍於邠州界蒿子  
谷韋家砦殺戮寧慶兩州賊軍約二千餘人並生擒

都頭指揮使及奪偽器等入奏召以銀器綵物賜之

冊府元龜

二年秋朱友謙叛襲鄜州殺節度使徐懷玉

徐懷玉為鄜坊節度使友珪既篡立河中朱友謙拒

命遣兵襲鄜州懷玉無備尋為所擄囚於公館及友

珪遣康懷英率師圍河中友謙慮變玉遂遇害

冊府元龜

末帝貞明元年春三月岐邠州將李保衡來降

貞明元年三月岐邠州留後李保衡以城歸順保衡

楊崇本養子崇本又李茂貞養子任邠州二十餘年  
去歲為其子彥魯所毒彥魯權知州事五十餘日保  
衡殺彥魯送款於帝即以保衡為華州節度使以河  
陽留後霍彥威為邠州節度使

冊府元龜

夏五月岐人圍邠州不克

岐王遣彰義節度使劉知俊圍邠州霍彥威固守拒  
之

通鑑

劉知俊為同州節度使奔李茂貞邠州亂茂貞

命知俊討之時邠州都校尉李保衡納款於朝廷未

帝遣霍彥威率衆先入於邠知俊遂圍其城半載不能下會李繼崇以秦州降於蜀知俊妻孥皆遷於成都遂解邠州之圍

冊府元龜

霍彥威事梁遷邠寧節度使

李茂貞遣梁叛將劉知俊攻邠州彥威固守踰年每獲知俊兵必縱還之知俊德之後不復攻

五代史霍彥威傳

冬十一月蜀遣兵攻岐劉知俊奔蜀蜀克鳳州

劉知俊攻霍彥威於邠州半歲不克聞秦州降蜀妻子皆遷成都解圍還鳳翔懼及禍夜率親軍斬關奔

蜀軍王宗綰自河池進兵會王宗瑤攻鳳州克之

綱目

初汴將劉知俊奔鳳翔李茂貞以為大將稍侵建之興鳳皆沒焉後知俊自岐奔蜀建厚禮之任為上將

令擊茂貞復興鳳二州

冊府元龜

十二月岐人以耀鼎二州來降

岐義勝節度使李彥韜知岐王衰弱舉耀鼎二州降

梁彥韜即溫韜也復姓溫氏名昭圖官任如故

綱目按

五代史溫韜傳李茂貞以華原縣為耀州以美原縣為鼎州梁改耀州為崇州鼎州為裕州



二年冬十月蜀攻岐取寶鷄遂圍鳳翔

蜀王宗綰等出大散關大破岐兵遂取寶鷄王宗播等出故關至隴州保勝節度使李繼岌畏岐王猜忌帥其衆二萬棄隴州奔於蜀軍蜀兵進攻隴州以繼岌為西北面行營第四招討會王宗綰等圍鳳翔岐兵不出會大雪蜀主召軍還

通鑑

蜀通正元年遣王宗

綰等率兵十二萬出大散關攻岐取隴州

五代史王建世家

五年春三月蜀兵入岐

蜀王宗播等自散關擊岐度渭水破岐將孟鐵山會

大雨而還分兵戍興元鳳州及威武城

威武城在鳳州北蜀所築

也

王宗昱攻隴州不克

通鑑

六年夏四月朱友謙以同州附晉

貞明六年友謙遣其子令德襲同州逐節度使程全

暉因求兼鎮末帝不許已而許之制命未至友謙復

叛始絕梁而附晉矣

五代史朱友謙傳

六月遣兵攻同州晉人救之秋九月師敗績

朱友謙以河中同州降晉梁遣劉鄩攻同州友謙求  
救乃遣存審與李嗣昭救之河中兵少而弱梁人素  
易之且不虞晉軍之速至也存審選精騎二百雜河  
中兵出擊鄩壘陽敗而走鄩兵追之晉騎反擊獲其  
騎兵五十梁人知其晉軍也皆大驚然河中糧少而  
新降人心頗持兩端晉軍屯朝邑諸將皆欲速戰存  
審曰使梁軍知吾利於速戰則將夾渭而營斷我餉  
道以持久困我敗之道也不若緩師示弱伺隙出奇

可以取勝乃按軍不動居旬日望氣者言夜有黑氣  
狀如鬪鷄存審曰可以一戰矣乃進軍擊鄆大敗之  
鄆閉壁不復出存審曰鄆兵已敗不如逸之乃休士  
卒遣裨將王建及牧馬於沙苑鄆以謂晉軍且懈乃  
夜遁去存審追及於渭河又大敗之

五代史符  
存審傳

冬十一月蜀人侵岐

蜀王遣宗籌將兵伐岐攻隴州岐王自將屯汧陽蜀  
將陳彥威敗岐兵於箭筈嶺

箭筈嶺在寶  
雞縣東北

蜀兵食盡

引還

綱目

後唐

莊宗同光二年三月遣使按視長安諸陵

唐室諸陵先為溫韜所發唐主以工部郎中李途為

長安按視諸陵使

通鑑

秋八月蜀遣兵屯洋州

蜀主以右定遠軍使王宗鐸為招討馬步使帥二十

一軍屯洋州以備唐

通鑑

三年秋九月命魏王繼岌郭崇韜伐蜀取鳳興州

後唐魏王繼岌同光三年九月為西征都統伐蜀繼

岌至鳳州偽武興軍節度使王承捷以鳳興文扶四

州降大軍食其芻粟得糧四十萬兵士八千魏王給

牒令攝武興軍節度使

冊府元龜

郭崇韜入散關指其山

曰吾輩進無成功不得復還此矣當盡力一決今饋

運將竭宜先取鳳州因其糧乃倍道而進王承捷以

鳳興文扶四州印節迎降得兵八千糧四十萬斛

通鑑

明宗天成元年夏四月魏王繼岌自蜀還至長安自殺  
郭從謙弑莊宗明宗入洛稱監國魏王繼岌至興平  
聞亂復引兵西謀保鳳翔退至武功李從襲曰退不  
如進請亟東行以救內難繼岌從之還至渭水留守  
張錢已斷浮梁循水浮渡至渭南腹心呂知柔等皆  
已竄匿從襲謂繼岌曰時事已去王宜自圖繼岌徘徊  
流涕乃自伏於牀命李環縊殺之任圜代將而東

華州都監李冲殺從襲

通鑑

長興元年秋九月武功令薛文玉激亂降除之

薛文玉為武功縣令長興元年九月西京奏武功縣  
百姓三千餘人持白棒入縣亂擊人吏分劫縣庫稅  
錢公解什物尋差兵士捉到結集首領武功鎮將跌  
跌疏等三十二人各招本罪稱縣令以大竿尺簡田  
所以衆心難抑其跌跌疏准法科斷文玉罰七十直  
主簿李彥柔罰五十直並勒停

冊府  
元龜

冬十二月遣安重誨督西征諸軍



長興元年十二月遣樞密使安重誨赴西面軍前時  
帝以蜀路險阻進兵艱難潼關以西物價絕賤百姓  
搬糧往利州每費一斛不得一斗至今噍類穰穰逃  
竄山谷或聚為盜慮不堪命帝念饋輓之苦形於顏  
色謂近臣曰關中勞擾軍前未有成功孰能辦吾事  
者朕須自行重誨奏曰此臣之責也臣今請行許之  
言訖面辭翼日發赴軍前

冊府  
元龜

三年春正月遣兵擊党項破之

樞密使范延光言自靈州至邠州使臣及外國入貢者多為党項所掠請發兵擊之遣靜難節度使藥彥稠前朔方節度使康福將兵七千討党項二月藥彥稠等奏破党項十九族俘二千七百人通鑑藥彥稠明宗時授邠州節度使詔會兵制置鹽州蕃戎逃遁獲陷蕃士庶千餘並遣復鄉里冊府元龜

四年春三月命李彝超徙鎮延安彝超拒命

定難節度使李仁福卒軍中立其子彝超為留後先

是關西諸鎮皆言李仁福潛通契丹南侵關中會仁福卒以其子彝超為彰武留後安從進為定難留後仍命靜塞節度使藥彥稠將兵五萬以宮苑使安重益為監軍送從進赴鎮勅諭夏銀綏宥將吏彝超年少未能扞禦故徙之延安從命則有富貴之福違命則有覆族之禍彝超上言為軍士擁留未得赴鎮詔遣使趣之

通鑑

秋七月延州節度使安從進討李彝超不克

彝超不奉詔遣其兄阿囉王守青嶺門

青嶺門蓋上郡橋山之長

城門集境內党項諸胡以自救藥彥稠等進屯蘆關

聚米

圖經蘆關在延州塞門寨北十五里

彝超遣党項抄糧運及攻具官軍

自蘆關退保金明

陳執中曰金明漢膚施縣地蘆關至金明二百里

安從進

攻夏州州城赫連勃勃所築堅如鐵石斲鑿不能入

又党項萬餘騎徜徉四野抄掠糧餉官軍無所芻牧

山路險狹關中民輸斗粟束橐費錢數緡民間困竭

不能供彝超登城謂從進曰夏州貧瘠非有珍寶蓄

積可以充貢賦也但以祖父世守此土不欲失之幸  
為表聞許其自新命從進引兵還自是夏州輕朝廷  
每有叛臣必陰與之連以邀賂遺

通鑑

閔帝應順元年春正月以潞王從珂為河東節度使不

受從珂舉兵鳳翔

四月以後潞王即位改元清泰

朱弘昭馮贇謀徙潞王從珂為河東節度使遣使監  
送赴鎮潞王既與朝廷猜阻朝廷又命洋王從璋權  
知鳳翔從璋性麓率樂禍前代安重誨鎮河中手殺

之從珂聞其來尤惡之謀於將佐皆曰離鎮必無全  
理乃移檄鄰道言朱弘昭等專制朝權懼傾社稷今  
將入朝以清君側以西都留守王思同當東出之道  
遣郝詡等詣長安說以利害餌以美妓思同謂將佐  
曰吾受明宗大恩今與鳳翔同反借使事成而榮猶  
為一時之叛臣況事敗而辱流千古之醜迹乎遂執  
詡等以聞時潞王使多為鄰道所執唯隴州防禦使  
相里金傾心附之

通鑑

相里金為隴州防禦使廢帝起

兵鳳翔馳檄四鄰四鄰未有應者獨金首遣判官薛文遇見廢帝往來計事廢帝即位德之拜保義軍節

度使

五代史相  
里金傳

二月遣兵討鳳翔三月官軍潰潞王遂入長安

愍帝以思同為西面行營馬步軍都部署三月會諸鎮兵圍鳳翔破東西關城從珂兵弱而守甚堅外兵死傷者衆從珂登城呼外兵而泣曰吾從先帝二十年大小數百戰甲不解體金瘡滿身士卒固嘗從我

矣今先帝先棄天下朝廷信用姦人離間骨肉我實何罪而見伐乎士卒聞者皆悲憐之興元張虔釗攻城西督戰甚急士卒苦之反兵攻虔釗走羽林指揮使楊思權呼曰潞王吾主也乃引軍自西門入降而使思同未知猶督戰嚴衛都指揮使尹暉麾其衆曰城西軍入城受賞矣何用戰耶士卒解甲棄仗聲聞數里遂皆入城降諸鎮之兵皆潰思同挺身走至長安西京副留守劉遂雍閉門不納從珂引兵東

五代史  
王思同



傳從珂建大將旗鼓整衆而東劉遂雍悉出府庫之財於外軍士前至者即給賞令過皆不入城從珂至長安遂雍迎謁都監王景從等奔還中外大駭

綱目

潞王執西京留守王思同殺之

三月二十二日潞王至昭應前鋒執思同來獻王謂左右曰思同計非於事然盡心於所奉亦可嘉也顧謂趙守均曰思同爾之故人可行逆之於路達予撫慰之意思同至潞王讓之曰賊臣傾我家國殘害骨

肉非子弟之過我起兵岐山蓋誅一二賊臣耳爾何  
首鼠兩端多方誤我今日之罪其可逃乎思同曰臣  
起自行間受先朝爵命擁旄仗鉞累歷重藩終無顯  
效以答殊遇臣非不知攀龍附鳳則福多扶衰濟弱  
則禍速但惟瞑目之後無面見先帝纓鼓膏原纍囚  
之常分也潞王為之改容徐謂之曰且宜憩歇潞王  
欲宥之而揚思權之徒恥見其面屢啟於劉延朗言  
思同不可留慮失士心又潞王入長安時尹暉盡得

思同家財及諸妓女故尤惡思同與劉延朗亟言之  
屬潞王醉不待報殺思同并其子德勝潞王醒召思  
同左右報已誅之矣潞王怒延朗累日嗟惜之

冊府元龜

潞王次華州執招討副使藥彥稠

三月甲子次華州執藥彥稠

五代史廢帝本紀

藥彥稠為副

招討使與王思同攻鳳翔禁軍之潰彥稠欲沿流而

遁為軍士所擒而獻

冊府元龜

夏四月興元武定兩鎮降蜀

張虔釗之討鳳翔也留武定節度使孫漢韶守興元

虔釗敗歸與漢韶舉兩鎮之地降蜀

綱目按明一統志唐武定軍

置洋州

五月興州刺史劉遂清棄鎮歸詔宥之

唐主之起鳳翔也召興州刺史劉遂清遲疑不至聞

唐主入洛乃悉集三泉西縣戍兵以歸自散關以南

城鎮悉棄之皆為蜀人所有唐主以其能自歸乃赦

之通鑑

冬十月蜀遣兵屯興州

九月詔鳳翔益兵守東安鎮以備蜀十月蜀李延厚將果州兵屯興州興州刺史馮暉自乾渠引戍兵歸

鳳翔

通鑑

廢帝清泰二年秋七月蜀攻金州防禦使馬全節拒却之

馬全節歷金州防禦使廢帝時蜀人攻金州州兵纔數百全節散家財與士卒堅守蜀人去

五代史馬全節傳

任

漢權西京弓弩指揮使末帝清泰二年漢權言六月  
二十一日與川賊戰兵少不敵都監崔希訥傷甚臣  
部署神武監驍兵士除夷傷外並至鳳翔又言整屋  
都頭許溫勇勝都頭王思儒強溫李文通下六百三  
十七人並自漢陰歸

冊府元龜

三年冬十二月延州軍亂殺節度使楊漢章

是月晉高祖即位改

元天福

清泰三年十二月以前坊州刺史劉景巖為彰武軍

節度留後景巖故河西鄜延帥高萬金之將校累任  
至坊州刺史家在延州父子豪右私家有丁夫兵仗  
勢傾郡邑邑人憚其強多推服之會楊漢章帥延州  
無政失蕃漢之心是時有詔借括戰馬及壯丁漢章  
以數千人將赴軍期兵仗鞍馬閱之於野而便成行  
景巖密令人撓之言契丹在河東丁壯有去無歸衆  
心懼殺漢章乃以其衆至景巖家推為留後朝廷不  
獲已而命之

冊府元龜按通鑑作同州小校門鐸  
作亂殺節度楊漢章楚掠州城與此互

金  
卷八十一  
異

邠州節度使以城降晉

周邊蔚為邠州李德琉從事晉高祖建義入雒德琉  
不即獻城蔚力勸曰清泰運去新主勃興兩都衣冠  
歸之大器在手矣公宜表率西諸侯入覲何遲疑若  
此稍稍達於外則後悔無及矣德琉然之乃馳使入  
覲朝廷知蔚有其力尋徵拜虞部員外郎

冊府元龜

丹州軍亂逐其刺史康承詢



丹州義軍作亂逐刺史康承詢承詢奔鄜州

通鑑

後晉

高祖天福三年冬十一月鳳翔軍亂討平之

鳳翔節度使李從曦厚文士而薄武人愛農民而嚴士卒由是將士怨之會發兵戍西邊作亂剽掠從曦發帳下兵擊之亂兵敗走至華州鎮國節度使張彥

澤邀擊盡誅之

綱目

七年春正月彰武亂軍攻延州遣兵救之

六月齊王即位次年仍稱

天福

卷八十一

彰武節度使丁審琪養部曲三千人縱之為暴於境  
內軍校賀行政與諸胡相結為亂攻延州遣防禦使  
何重建將兵救之同廊援兵繼至乃得免以重建為

留後召審琪歸朝

通鑑

齊王天福八年秋八月綏州刺史李彝敏作亂伏誅

夏州牙內指揮使拓跋崇斌謀作亂綏州刺史李彝  
敏將助之事覺彝敏棄州與其弟彝俊等五人奔延

州定難節度使李彝殷奏彝敏作亂之狀詔執彝敏

送夏州斬之

通鑑

開運元年春二月以李彝殷為契丹西南面招討使

定難節度使李彝殷奏將兵四萬自麟州濟河侵契

丹之境詔以彝殷為契丹西南面招討使

通鑑

後漢

高祖天福十二年春正月長安軍亂討平之

晉昌節度使趙在禮入朝其裨將留長安者作亂節

度副使李肅討之軍府以安

通鑑

二月蜀遣兵攻鳳州不克

蜀李繼勲與興州刺史劉景攻固鎮拔之何重建請  
出蜀兵與階成兵共扼散關以取鳳州蜀主發山南  
兵三千七百赴之重建遣宮苑使崔延琛將兵攻鳳  
州不克退保固鎮

通鑑

延州軍亂逐其節度使周密

高允權為膚施令罷居於家是時周密為彰信軍節

度使契丹滅晉延州軍亂逐密密守東城而西城之

兵以允權為留後歸漢拜節度使

五代史高  
萬興傳

丹州將高彥珣舉州來降

丹州指揮使高彥珣以其州來歸

五代史漢  
高祖本紀

夏四月蜀人取鳳州

蜀孫漢韶將兵二萬攻鳳州軍於固鎮分兵扼散關  
以絕援路鳳州防禦使石奉頤舉州降蜀奉頤晉之

宗屬也

通鑑

冬十月晉昌節度使趙匡贊叛降於蜀

晉昌節度使趙匡贊恐終不為朝廷所容是月遣使降蜀請自終南山路出兵應援

通鑑

十二月蜀遣兵數道入雍州

蜀主以王處回書招鳳翔節度使侯益以山南西道節度使張虔釗為招討使雄武節度使何重建副之共將兵五萬虔釗出散關重建出隴州以擊鳳翔奉鑾肅衛都虞候李廷珪將兵二萬出子午谷以援長

安諸軍齊發旌旗數十里侯益請降於蜀使吳崇憚持兵籍糧帳西還與趙匡贊同上表請出兵平定關

中  
通鑑

隱帝乾祐元年二月將軍王景崇擊蜀兵大破之

趙匡贊入見王景崇等至長安聞蜀兵已入秦川發本道及趙匡贊牙兵千餘人同拒之恐匡贊牙兵亡逸欲文其面微露風旨軍校趙思綰首請自文面以帥下景崇悅齊藏珍竊言曰思綰山暴難制不如殺

之景崇不聽蜀李廷珪聞匡贊已入朝欲引歸景崇邀之敗廷珪於子午谷張虔釗至寶鷄侯益閉壁拒之虔釗勢孤夜遁景崇追敗蜀兵於散關俘將卒四百人景崇引兵至鳳翔侯益尚未行景崇以禁兵分守諸門或勸景崇殺益景崇以所受密旨嗣主未之知或疑於專殺猶豫未決益聞之不告景崇而去景崇悔自詬及益入朝廢帝問何故召蜀軍對曰臣欲誘致而殺之帝哂之

通鑑

王景崇奏於大散關大敗蜀



俘斬三千人初北虜犯京師侯益趙贊皆受賊命節制蒲關高祖入洛頗懷反仄朝廷移贊於京兆益與贊皆求援於蜀蜀遣何建率軍出大散關以應之至是景崇糾合岐雍邠涇之師以破之又遣人送所獲偽蜀將校軍士四百三十八人至關下詔釋之仍各

賜衣服

冊府元龜

三月長安軍校趙思綰據城反

趙思綰為趙贊牙將贊鎮永興入朝留思綰兵數百

人於永興高祖遣使者召思綰等是時候益來朝思綰以兵從益東歸思綰謂其下常彥卿曰趙公已入人手吾屬至並死矣彥卿曰事至而變勿預言也益行至永興永興副使安友規出迎益飲於郊亭思綰前曰兵館城東然將士家屬皆居城中願縱兵入城挈其家屬益信以為然思綰與部下入城有州校坐於城門思綰奪其佩劍斬之並斬門者十餘人遂閉門劫庫兵以叛高祖遣郭從義王峻討之

五代史趙思綰傳

護國節度使李守貞反陷潼關

邠涇同華四鎮俱上言守貞與永興鳳翔同反始守  
貞陰有異志有輕朝廷之志會趙思綰據長安奉表  
獻御衣於守貞守貞乃自稱秦王遣其驍將王繼勲  
據潼關同州距河中最近匡國節度使張彥威常詎  
守貞所為奏請先為之備詔指揮羅金山將兵戍同  
州故同州不為所併

通鑑

夏四月克潼關

陝州兵馬都監王玉奏克復潼關

五代史  
隱帝紀

六月邠州留後王景崇反遣兵討之

侯益至京師陰以事中景崇景崇心不自安諷鳳翔  
將吏求已領府事朝廷患之拜景崇邠州留後以趙  
暉為鳳翔節度使景崇乃叛盡殺侯益家屬與趙思  
綰共推李守貞為秦王隱帝即以趙暉討之

五代史  
王景崇

傳

秋八月以郭威為招慰安撫使督關中諸軍

自河中永興鳳翔三鎮拒命繼遣諸將討之昭義節  
度使常思屯潼關白文珂屯同州趙暉屯咸陽惟郭  
從義王峻置柵近長安而二人相惡如水火自春徂  
秋皆相仗莫肯攻戰帝患之欲遣重臣臨督以郭威  
為西面軍前招慰安撫使諸軍皆受威節度

通鑑

郭威督諸將討李守貞克西關城

威與諸將議攻討諸將欲先取長安鳳翔鎮國節度  
使扈從珂曰今三叛連衡推守貞為主守貞亡則兩

鎮自破矣威善之於是威自陝州白文珂劉詞自同  
州常思自潼關三道進攻文珂克西關城柵於河西  
諸將請急攻威曰守貞前朝宿將健鬪好施况城臨  
大河未易輕也乃發諸州民夫二萬餘人使白文珂  
等帥之剗長壕築連城循河設火鋪連延數十里遣  
水軍艤舟於岸寇有潛往來者無不擒之於是守貞

如坐網中矣

通鑑

九月蜀兵援鳳翔都部署趙暉等擊敗之

乾祐元年九月鳳翔都部署趙暉奏大破川兵於大散關殺三千餘人其餘棄甲而遁

冊府元龜

冬十月趙暉圍王景崇於鳳翔蜀兵救之不克

景崇遣兵出西門趙暉擊破之遂取西關城景崇退守大城暉塹而圍之數挑戰不出暉潛遣千餘人擐甲執兵效蜀旂幟循南山而下令諸將聲言蜀兵至矣景崇果遣兵數千出迎之暉設伏掩擊盡殪之自是景崇不敢出蜀主遣南山節度使安思謙將兵救

鳳翔又遣雄武節度使韓保貞引兵出汧陽以分漢兵之勢安思謙屯右界漢兵屯寶鷄思謙遣申貴將兵二千設伏於竹林以兵數百壓寶鷄而陳漢兵逐之遇伏而敗蜀兵遂北破寶鷄寨蜀兵去漢兵復入寶鷄思謙進屯渭水漢益兵五千戍寶鷄思謙畏之退屯鳳州尋歸興元

通鑑

定難兵援河中次於延丹徐引還

彰武節度使高允權與定難節度使李彝殷有隙李



守貞密求援於彝殷發兵屯延丹境上聞官軍圍河

中乃退允權以狀聞彝殷亦自訴朝廷和解之

通鑑

十一月蜀兵入散關

王景崇告急於蜀蜀主命安思謙再出兵救之進屯

散關擊漢箭箬安都寨破之韓保貞出新關

九域志云隴州

汧源縣有新關鎮有軍於隴州趙暉告急於郭威威自往赴之

至華州聞蜀兵食盡引去威乃還

通鑑

二年春正月李守貞襲河西柵敗歸

郭威將至河中白文珂出迎之李守貞夜遣王繼勳等引精兵千餘人襲漢柵縱火大譟軍中狼狽不知所為劉詞神色自若下令曰小盜不足驚也帥衆擊之裨將李韜拔稍先進衆從之河中兵退走死者七百人繼勳重傷僅以身免守貞之欲攻河西柵也先遣人出酤酒於村墅或貰與不責其直邏騎多醉河中兵得潛入寨威乃下令將士非攜宴毋得私飲愛將李審晨飲少酒威立斬以徇

綱目

夏四月永興叛將趙思綰降

思綰城中食盡殺人而食每犒宴殺人數百庖宰一如羊豕思綰取其膽以酒吞之曰食膽至千勇無敵矣思綰計窮募人為地道將走蜀其判官程讓能謂思綰曰公比於國無嫌但懼死而為此耳今國家用兵三方勞敝不已誠能翻然効順以功補過庶幾有生若坐守窮城待死而已思綰然之遣使乞降拜鎮

國軍留後

五代史趙思綰傳

秋七月都部署郭從義誘殺趙思綰於長安

七月永興都部署郭從義奏新降華州留後趙思綰  
五月三日授華州留後詔准赴任三移行期仍要鎭  
甲以給士兵及促之竟不遵路至七月九日夕有部  
曲曹彥進告思綰欲於十一日夜與同惡五百人奔  
南山入蜀是日詰旦再促上路云俟夜進途臣等與  
王俊入城分兵守四門其趙思綰部下軍各已執仗  
遂至牙署令召思綰至則執之與一行徒黨並處置

訖  
冊府元龜

冬十二月叛將王景崇自殺鳳翔平

守貞思綰相次皆敗景崇客周璨謂景崇曰公能守此者以有河中京兆也今皆敗矣何所恃乎不如降也景崇曰誠累君等然事急矣吾欲為萬有一得之計可乎吾聞趙暉精兵皆在城北今使公孫輦等燒城東門偽降吾以牙兵擊其城北兵不成而死猶勝於束手也燦等皆然之遲明輦燒東門將降而府中

火起景崇自焚矣輦乃降暉

五代史王景崇傳

三年春正月詔收葬鳳翔遺骸

遣使詣河中鳳翔收瘞戰死及餓殍遺骸

通鑑

後周

太祖廣順元年夏五月夏州叛附北漢

定難節度使李彝殷遣使奉表於北漢

通鑑

二年春正月遣兵戍長安

永興節度使李洪信自以漢室近親心不自安城中

兵不滿千人王峻在陝以救晉州為名發其徒數百及北漢兵遁去遣禁兵千餘人戍長安洪信懼遂入

朝

通鑑

漢兵攻府州折德宸擊走之

北漢遣兵寇府州防禦使折德宸敗之殺二千餘人

通鑑

三年春正月麟州刺史楊崇訓來降

廣順三年正月夏州李彝殷府州折德宸上言河東

界偽麟州刺史楊崇訓以蕃部攻圍乞歸賜敕書曰  
麟州刺史楊崇訓及軍州將吏職員等據夏州節度  
使李彝殷奏得汝等狀稱劉崇拒命聖朝堅其逆壘  
今被部族侵迫乞垂救解兼已稱大朝正朔並罔逆  
命邊郡無歸值妖孽之脅從致朝貢之阻絕今則蕃  
部兵民助我討違汝等哀告蕃鄰欲謀歸向備覩變  
通之意特用弘納之仁宜示撫安用獎忠順已指揮  
州府及諸蕃部不令進攻汝等便宜明宣朝旨告諭



軍民應是通河東道路口岸盡時遣人守禦不得通人來往凡有公事一一奏取朝廷指揮其官員將校職長一切依舊仍分析名銜申奏當議等第加恩兼

之酬賞

冊府元龜

二月遣兵屯延州

彰武節度高允權卒其子紹基謀襲位詐稱允權疾病表已知軍府事觀察判官李彬切諫紹基怒斬之以謀反聞帝命折從阮分兵屯延州紹基始懼又命

供奉官張懷貞將禁兵屯廊延紹基乃悉以軍府事

授副使張匡圖周以客省使向訓權知延州

通鑑

向訓

知延州上言所屬蕃部侵盜漢戶臣已招喚諸部酋

率設酒食仍令誓約更不敢侵犯

冊府元龜

冬十二月漢兵侵府州折德宸敗之

太祖廣順三年十二月府州防禦使折德宸奏北漢

將喬贊入寇擊走之

冊府元龜

世宗顯德二年夏四月遣鳳翔節度使王景帥師伐蜀

顯德二年四月詔鳳翔節度使王景攻收秦鳳二州

以曹州節度使韓通充西南面行營都虞候五月王

景上言今月七日收下黃牛等三砦相次又收下黃

花

賈志云黃花鎮在鳳縣東北十里

等五砦其鄉村人戶並已招攜

安撫

冊府元龜

秋九月王景擊蜀兵於黃花敗之

蜀李廷珪遣奇兵出斜谷屯白澗

九域志鳳州梁泉縣有白澗鎮

又

分兵出鳳州之北唐倉鎮及黃花谷絕周糧道王景

遣裨將張建雄將兵二千抵黃花又遣千人趣唐倉  
扼蜀歸路蜀王巒將兵出唐倉與建雄戰於黃花蜀  
兵敗奔唐倉遇周兵又敗虜巒及其將士三千人兵

皆潰

通鑑

冬十一月克鳳州

王景等圍鳳州韓通分兵城固鎮以絕蜀之援兵遂  
克鳳州擒其節度使王環及都監趙宗溥等將士五  
千人宗溥不食而死詔將士願留者優其俸賜願去

者給資裝稅外科徭悉罷之

綱目

三年春三月延州民亂攻其鎮將李彥頡

彰武留後李彥頡性貪虐部民與羌胡作亂攻之上

召彥頡還朝

通鑑

四年冬十月楊重訓以麟州降

北漢麟州刺史楊重訓舉城降以為麟州防禦使

通鑑

五年冬十二月制置使判官李玉襲蜀歸安鎮敗沒

世宗謀伐蜀以侍郎高防為西南面制置使贊善李

玉為判官玉至長安或言蜀歸安鎮在長安南三百餘里可襲取也玉信之牒永興節度使王彥超索兵二百彥超以為歸安道阻隘難取玉曰吾自奉密旨彥超不得已與之玉將以往蜀歸安鎮過使李承勳據險邀之斬玉其衆皆沒

通鑑

宋

太祖乾德元年冬十二月漢寇府州節度使折德宸敗之

折德宸敗北漢軍於城下擒其將楊璘

宋史太祖本紀

二年冬十二月王全斌克興州

乾德二年冬下詔伐蜀全斌為行營前軍督部署率禁軍步騎二萬諸州兵萬人由鳳州路進討召示川陝地圖授以方略十二月率兵拔乾渠渡萬仞燕子二砦遂下興州蜀刺史藍思綰退保西縣敗蜀軍七千人獲軍糧四十餘萬斛進拔石圖二十餘巖先鋒史延德進軍三泉敗蜀軍數萬擒招討使韓保正副

使李進獲糧三十萬斛

宋史王全斌傳

太宗太平興國七年夏五月遣使夏州迎李繼捧親屬

詣闕李繼遷奔地斤澤

李繼遷繼捧族弟也繼捧歸宋時年二十留居銀州及使至召總麻親赴闕乃詐言乳母死出葬於郊遂與其黨數十人奔入地斤澤澤距夏州東北三百里

宋史夏國傳

契丹寇府州州兵擊破之



五月己未府州破契丹於新澤砦獲其將校以下百

人

宋史太  
宗本紀

冬閏十二月契丹寇豐州州兵獲之

閏月戊子朔豐州與契丹戰破之獲其天德節度使

蕭太

宋史太  
宗本紀

八年春三月契丹寇豐州敗之

三月豐州破契丹兵降三千餘帳

宋史太  
宗本紀

冬十月都巡檢曹光實等擊李繼遷於地斤澤破走之

繼遷入地斤澤知夏州尹憲與都巡檢曹光實偵知夜襲破之斬首五百級焚四百餘帳繼遷與其弟遁

免獲其母妻

宋史夏國傳

雍熙二年春二月李繼遷陷銀州據之

繼遷遁免復連娶豪族轉遷無常漸以彊大西人以李氏世著恩德多歸之繼遷因語其豪右曰李氏世有西土今一旦絕之爾等不忘李氏能從我興復乎衆曰諾遂與弟繼冲破丑重遇貴張浦李大信等起

夏州乃詐降誘殺曹光實於葭蘆川遂襲銀州據之

時雍熙二年二月也

宋史夏國傳

夏五月副將王侁擊李繼遷走之銀麟等州蕃內附

初繼遷既殺曹光實遂圍三族砦砦將折遇乜殺監軍使者與繼遷合田仁朗行次綏州請益兵留月餘俟報時繼遷乘勝進攻撫寧砦仁朗聞之喜曰撫寧小而固非浹旬所能破我俟其困以大兵臨之分遣強弩三百邀其歸路虜成擒矣部署已定仁朗欲示

閒暇縱酒擄捕仇等因媒蘖之帝聞三族已陷大怒徵仁朗還貸死竄商州是月仇等出銀州北破悉利諸砦梟其代州刺史折羅遇麟州諸蕃皆請納馬贖罪仇遂與所部兵入濁輪川斬賊首五千級繼遷及遇也遁去由是銀麟夏三州番百二十五族悉內附戶萬六千餘

宋元通鑑

淳化二年秋七月李繼遷請降以為銀州觀察使

淳化二年秋七月李繼遷請降以為銀州觀察使賜

國姓改名保吉

宋史太宗本紀

李繼遷襲銀州據之繼捧節

制夏臺言能歸款即授洛苑使銀州刺史淳化初復

與繼捧戰於安慶澤不利轉攻夏州繼捧乞師及翟

守素來乃奉表歸款授銀州觀察

宋史夏國傳

五年李繼遷掠綏州以李繼隆為都部署討之

繼遷徙綏州民於平夏部將高文岷等因衆不樂反

攻敗之繼遷復圍堡砦掠居民焚積聚詔李繼隆等

進討繼遷夜襲保忠

李繼捧賜名趙保忠

走之獲其輜重以歸

宋史夏

國傳

至道元年春正月契丹寇府州節度使折御卿擊敗之  
折御卿拜永安軍節度使契丹衆萬餘入寇御卿大  
敗之於子河汭斬首五千級獲馬千匹契丹將號突  
厥太尉司徒錫哩死者二十餘人擒其吐渾一人自  
是契丹知所畏太宗遣使問御卿曰西北要害皆屯  
勁兵戎人何自而至御卿對曰敵緣山硤小徑入謀  
剽掠臣諜知之遣人邀其歸路因縱兵大擊敗之人

馬墜崖谷死者相枕其大將韓德威僅以身免皆聖

靈所及非臣之功也上嘉之

宋史折  
御卿傳

夏六月以李繼遷為鄜州節度使不受

繼遷遣押衙張浦以橐駝及良馬來獻太宗令衛士

翹關超乘引彊奪槊於後園俾浦等觀且令兵士皆

拓兩石弓帝笑問浦曰羌人敢敵否對曰羌部弓弱

矢短但見此長大矢則已遁矣況敢敵乎遣使持詔

拜繼遷鄜州節度使不受乃以浦為鄜州團練留京

師

宋史夏

國傳

冬十二月契丹侵府州折御卿禦之卒於軍

折御卿被病韓德威謀知且為李繼遷所誘率衆來  
侵以報子河汭之役御卿力疾出戰德威聞其至不  
敢進會疾甚其母密遣人召歸御卿曰世受國恩邊  
寇未滅御卿罪也今臨敵棄士卒自便不可死於軍  
中乃其分也為白太夫人無念我忠孝豈得兩全言  
訖泣下翌日卒上聞悼惜久之以其子惟正知州事



宋史折  
御卿傳

二年夏四月詔置李繼遷之母於延州

保安軍奏獲李繼遷母太宗甚喜時寇準為樞密副  
使呂端為宰相獨召準與之謀準退自宰相幕次前  
過不入端使人邀至幕中曰鄉者上召君何為準以  
獲繼遷母告端曰君何以處之準曰準欲斬於保安  
軍北門之外端曰必若此非計之得者也願君少緩  
其事端將覆奏之即召閤門吏使奏宰相呂端請對

上召見之端具道準言且言昔項羽得太公欲烹之漢高祖曰願遺我一杯羹夫舉大事者固不顧其親況繼遷跳梁悖逆之人哉且陛下今日殺繼遷之母繼遷可擒乎不然徒樹怨讐而益堅其叛心耳宜置於延州使善養視之以招徠繼遷雖不能即降終可以繫其心而母死生之命在我矣上拊髀稱善曰微卿幾悞我事即用端策

涑水記聞按朱子綱目是年四月詔置繼遷母於延州

考西夏傳繼遷之母於太平興國八年及其妻並獲益至是年議定始置之延州耳涑水記聞述其巔末

非一年一時事也

真宗咸平元年春三月李繼遷降

三月真宗即位

咸平春繼遷復表歸順真宗乃授夏州刺史定難節度夏銀綏宥靜等州觀察處置等使加邑千戶實封二百戶益功臣號乃放張浦還封繼遷母衛慕氏衛國太夫人子德明為定難軍節度行軍司馬未幾復

抄邊

宋史夏國傳

五年夏六月李繼遷寇麟州知州衛居實敗之

六月癸酉繼遷圍麟州曹瑯請濟師詔并代石隰州  
發兵援之己酉知麟州衛居實言繼遷以衆二萬來

攻城兵出擊走之殺傷過半

宋史真宗本紀

詔遣張崇貴王

涉議和割河西銀夏等五州與之六月繼遷復以二

萬騎圍麟州詔金明巡檢李繼周擊之圍未解麟州

部署請濟師真宗閱地圖曰麟州依險三面孤絕僂

力可守但城中乏水可憂耳乃遣兵走援繼遷果據

水砦薄城已五日知州衛居實出奇兵突戰絕勇士

城下城上鼓噪矢石如注殺傷萬餘人繼遷去

夏國傳

按夏國傳編此事於六年而本紀及李繼周傳皆以為在五年今從之

冬十二月長安禁卒謀作亂知永興軍向敏中討平之  
向敏中為廊延路緣邊安撫使俄還京兆密詔盡付  
西鄙許便宜從事敏中得詔藏之視政如常日會大  
儺有告禁卒欲倚儺為亂者敏中密使麾兵被甲伏  
廡下幕中明日盡召賓僚兵官置酒縱閱無一人預  
知者命儺入先馳騁於中門外後召至階敏中振袂

一揮伏出盡擒之果各懷短刃即席斬焉既屏其尸

以灰沙掃庭張樂宴飲坐客皆股慄

宋史向敏中傳

六年春三月綏州蕃部內附

三月綏州東山蕃部軍使拽白等內屬

宋史真宗本紀

景德元年春三月蕃部入寇麟府兵敗之

三月威虜軍守將破契丹於長城口追北過陽山斬

獲甚衆柳谷川蕃部入寇麟府擊敗之擒千餘人乙

巳麟府路言敗西人於神堆破其砦柵

宋史真宗本紀

三年秋九月趙德明降

九月乙丑夏州趙德明奉表歸款復遣劉仁勗奉誓表向敏中請以德明表誓藏盟府帝嘉之十月遣使授德明太師兼侍中充定難節度使封西平王賜賚甚厚給奉如內地因索子弟入質德明謂非先世故事不遣唯獻駝馬謝恩而已未幾契丹亦冊德明為

夏國王

宋元通鑑按德明為繼遷子

大中祥符四年春二月帝如潼關遣使祀西嶽

二月壬子出潼關渡渭河遣近臣祀西嶽

宋史真宗本紀

仁宗寶元元年冬十二月元昊叛

元昊表遣使詣五臺供佛以窺河東道路既還與諸酋軟血約先攻麟延欲自靖德塞門砦赤城路三道並入遂築壇受冊即皇帝位國號大夏年號天授禮法延祚

宋史夏國傳

元昊未叛前其部落山遇者歸延州

告其謀時天章閣待制郭勸守延州乃械錮還賊示朝廷不疑之意賊戮其族無遺類由是西人怨懼向



化之心絕矣

儒林公議

二年春二月詔潼關設備置樓櫓

夏臺叛命之二年勢益熾橫朝廷疑其有吞噬關中之意由是獻議者請修潼關以拒之時宋庠參預大政銳意主其議遂詔興板縮置樓櫓戰具回關門而反闔之關中士民嗟怨謂朝廷棄之矣甚者取材興役半出於華陰其民之心可知也然見者則知其無益於備而徒失民心

儒林公議

冬十一月夏人寇保安軍狄青擊敗之

青初以善騎射為騎御散直從西征戰安遠諸砦皆克捷臨敵披髮帶銅面具出入賊中皆披靡莫敢當至是元昊寇保安軍鈴轄盧守懃使青擊走之帝欲

召見問以方略會賊寇渭州命圖形以進

宋元通鑑

康定元年春正月元昊寇延州副總管劉平石元孫戰敗績陷賊中

劉平為環慶路馬步軍副總管屬元昊盛兵攻保安

軍時平屯慶州范雍以書召平平與石元孫合軍趨土門既有告敵兵破金明圍延州者雍復召平與元孫救延州平素輕敵督騎兵晝夜倍道行明日至萬安鎮平先發步兵繼進夜至三川口西十里止營遣騎兵先趨延州爭門時廊延都監黃德和將二千餘人屯保安北碎金谷巡檢万俟政郭遵各將所部分屯雍皆召之為外援平亦使人趣其行詰旦步兵未至平與元孫還逆之行二十里乃遇步兵及德和万

俟政郭遵所將兵悉至步騎萬餘結陣東行五里與敵遇平與賊皆為偃月陣相向有頃敵兵涉水為橫陣郭遵及忠佐王信薄之不能入官軍並進殺數百人乃退敵復蔽盾為陣官軍復擊却之奪盾殺獲及溺者幾千人平中流矢日暮敵以輕兵薄戰官軍引却黃德和居陣後望見軍却率麾下走保西南山衆從之皆潰平遣其子宜孫馳追德和德和驅馬遁赴甘泉平遣軍校杖劍遮留得千餘人轉鬪三日賊退

還水東平率餘衆保西南山立七柵自固敵夜使人叩柵問大將安在士不應復使人偽為戍卒遞文移平平殺之夜四鼓敵環營呼曰如許殘兵不降何待平旦敵酋舉鞭麾騎自山四出合擊絕官軍為二平遂與元孫等皆被執

宋史劉平傳

盧政太原文水人以神

衛都頭從劉平與夏人戰延州虜薄西南隅兵不得成列政引數騎挑戰發伏弩二百射却之

盧政傳

康定

中元昊入延州東路犯安南承平兩寨又以兵犯西

路聲言將襲保安軍故延州發兵八萬支東西二隅而元昊乃乘虛由北路擊破金明寨擒李士彬直犯五龍川破劉平石元孫遂圍延州

東軒記

初起廊延兵

十萬人吐谷坂欲與賊遇乃戰戰時昏矣賊多解馬休勁兵驅老弱對敵士卒得利人人出死力與戰投夜且息更三起鬪會明老弱略盡士卒爭獲過當悉已疲番軍始徐鼓起士揭新旗乘高處呼漢兵來鬪軍士氣失賊稍出馬馳略陣上調呼射軍中軍人多

死此時特劉石軍也前此分萬餘人屬監軍黃德和使屯西坡以張向背為應援事已急念引去賊必乘之恐逼險不利不如舍軍決死幸有所完兩將方議未熟都監郭應起曰太尉決出此謀應願走德和軍招與俱來語未已平曰始議固在舍人呼軍吏出騎士百人從去應曰得百人不足為護徒自露彼知吾呼旁軍必出馬遮去路矣不如獨去乃下令軍中皆完陣自固至德和軍軍聞應來白開壁欲內德和不

肯促閉壁應收馬立陣外呼卒將前與語傳太尉令  
卒將還白之德和固怯聞敵大殊不敢去應連促數  
數度無以拒詆應曰先自去報太尉軍隨至矣第戰  
無留待也應不敢止復馳還白德和語平等信以為  
德和審來即鼓起士戰連三北德和軍竟不來應獨  
出入行間軍稍却即回馬以殿持大鐵稍橫突之所  
當盡死最後軍北時賊使人持大索立高處迎應輒  
為應所斷終不能得應因縱應深入鼓其旁曰急追



漢兵留十餘弩連射應馬馬死步下行殺數人欲歸  
軍取馬軍已亂不得入乃脫身亡去士卒死者什八  
兩太尉失軍不還邊大警承受者馳二十驛比三晝  
夜至京師以聞已而賊收去敗兵散亡十餘日稍稍  
出邊旁諸郡負傷被創不及四萬獨德和一軍完天  
子使吏治德和以法死天子思平等失援不救人人  
力死哀之下詔贈將佐已下官七遷子孫聽以父兄  
任為右職云

王向記  
客言

夏五月元昊陷塞門寨

康定元年五月元昊陷塞門砦兵馬監押王繼元死

之

宋史仁  
宗本紀

秋八月經略安撫副使范仲淹治兵延州

范仲淹與韓琦並為陝西經略安撫副使仲淹以延州諸砦多失守請自行詔仲淹兼知延州先是詔分邊兵總管領萬人鈐轄領五千人都監領三千人寇至禦之則官卑者先出仲淹曰將不擇人以官為序

取敗之道也於是大閱州兵得萬八千人分六將領  
之日夜訓練量賊衆寡使更出禦敵人聞之相戒曰  
無以延州為意今小范老子腹中自有數萬甲兵不  
比大范老子可欺也大范蓋指雍也仲淹以民遠輸  
勞苦請建廊城為軍以河中府同華州中下戶租稅  
就輸之春夏徙兵就食可省糴十之三詔以為康定  
軍仲淹又修承平永平等砦稍招還流亡定堡障通  
斥堠城十二寨於是羌漢之民相踵歸業

宋元  
通鑑

鄜州將种世衡城清澗

种世衡歷鄜州判官事西邊用兵守備不足世衡建言延安東北二百里故寬州請因廢壘而興之以當寇衝右可固延安之勢左可致河東之粟北可復銀夏之舊朝廷從之命董其役夏人屢出爭世衡且戰且城然處險無泉議不可守鑿地百五十尺始至於石石工辭不可穿世衡命屑石一畚酬百錢卒得泉城成賜名青澗城遷內殿崇班知城事世衡開營

田二千頃募商賈通貨利城遂富實

宋史种世衡傳

慶歷元年春正月詔諸道會兵討元昊不果行

帝以元昊勢益猖獗遣翰林學士晁宗慤即陝西問  
攻守之策夏竦等具二說令副使韓琦判官尹洙詣  
闕奏之帝取攻策執政以為難杜衍亦曰徼倖成功  
非萬全計帝不聽詔鄜延涇原會兵期以正月進討  
范仲淹言正月塞外大寒不如俟春深賊馬瘦人飢  
勢易制且鄜延密邇靈夏西羌必由之地第按兵不

動以觀其釁乞留廊延一路以備招納或擇利進城

廢砦以牽制元昊帝從之

通鑑續編

元昊遣人至延州議和

元昊歸陷將高延德因與仲淹約和仲淹為書戒諭之會任福敗於好水川元昊答書語不遜仲淹對來使焚之大臣以為不當輒通書又不當輒焚之降本

曹員外郎知耀州

宋史范仲淹傳

元昊來求盟琦曰無約而

請和者謀也命諸將戒嚴

韓琦傳

夏四月詔夏竦分屯鄜州

夏四月以陳執中同陝西安撫經略使時夏竦判永興軍執中知軍事議多異同故分命竦屯鄜州竦雅意在朝廷及任以西事頗依違顧避嘗出巡邊置侍婢中軍帳下幾至兵變元昊命募得竦首者與錢三

千其見輕侮如此

宋元通鑑

六月詔陝西嚴邊備

六月壬辰詔陝西諸路總管司嚴邊備毋輒入賊界

金史紀事本末卷八十一  
賊至則禦之

宋史仁宗本紀

秋七月元昊寇麟府州

慶厯元年七月元昊寇麟府州八月詔廊延部署以

兵援麟府

宋史仁宗本紀

八月元昊陷豐州麟府兵擊敗之

八月元昊寇金明砦破寧遠砦砦主王世亶兵馬監

押王顯死之陷豐州知州王餘慶兵馬監押孫吉死

之

宋史仁宗本紀

夏人攻麟府不能下乃引兵攻豐州孤城



無援遂據之又屯要害絕麟府餉道會張亢管勾麟府軍馬事破之於柏子又破之於兔毛川亢築十餘

柵河外始固

夏國傳

毀潼關樓櫓

慶曆元年八月乙未毀潼關新置樓櫓

宋史仁宗本紀

九月延州經略龐籍築緣邊諸砦

時分陝西為四路以龐籍知延州兼經略安撫招討使自元昊反延州城砦焚掠殆盡籍至稍葺治之戍

兵十萬無壁壘皆散處城中畏籍莫敢犯法籍命部將狄青將萬人築招安砦於橋子谷旁以斷寇出入之路又使周美襲取承平砦王信築龍安寨悉復所亡地築十一城延民以安

宋元通鑑

三年春正月元昊上書請和

正月元昊自名曩霄遣人來納款

宋史仁宗本紀

元昊以旺

榮

元昊臣也姓野利

書來會帝厭兵因招懷之遣籍報書使

者往反踰年又遣賀從勗來改名曰曩霄稱男不稱

臣籍不敢聞從勗曰子事父猶臣事君也若得至京師天子不許更歸議之籍送使者闕下因陳便宜言羌久不通和市國人愁怨今辭禮寢順必有改事中

國之心請遣使者申諭之朝廷採用其策

龐籍傳

元昊

遣使來稱男邦泥定國元卒上書父大宋皇帝更名

曩霄而不稱臣元卒即吾祖也如可汗號

夏國傳

夏四月遣使諭元昊

賀從勗至京帝用龐籍言命著作佐郎邵良佐如夏

州許封元昊為夏國主歲賜絹十萬疋茶三萬斤良  
佐至夏州元昊亦遣如定聿捨張延壽等來議和及  
歲幣時元昊倚契丹邀索無厭晏殊等厭兵將一切  
從之韓琦力陳其不便帝嘉納之

宋元通鑑

嘉祐二年夏五月夏人襲殺麟府州守將郭恩

五月管勾麟府軍馬公事郭恩為夏人所殺歿於斡

道塢

宋史仁宗本紀

嘉祐中麟州之役諒祚二年間連以兵

屯窟野河進逼邊界聚而復散故武戡郭恩習以為

常輕兵而出至忽理堆伏發而兵散

東軒筆記

六年冬十二月復豐州

十二月丙戌復豐州

宋史仁宗本紀

英宗治平元年十二月命內侍監陝西軍

帝遣王昭明等四人體量軍情治其詞訟有賞罰則  
與其帥議大事以聞各許歲乘驛奏事諫官呂誨言  
唐舉兵不利未不自監軍者我朝因循未革奈何  
又增置此員其權與安撫使均矣乞罷之精選帥臣

專制閭外之權傳堯俞趙瞻皆有論列不聽

通鑑續編

四年冬十月復綏州

是年正月神宗即位

治平四年冬十月癸酉知清澗城种諤復綏州

宋史神宗

本紀夏將嵬名山部落在故綏州其弟夷山先降諤使

人因夷山以誘之賂以金盃名山小吏李文喜受而許降而名山未之知也諤即以聞詔轉運使薛向及陸詵委諤招納諤不待報悉起所部兵長驅而前圍其帳名山舉衆從諤而南得酋領三百戶萬五千兵

萬人種諤傳種諤既受鬼名山降夏主諒祚乃詐為會

議誘知保安軍楊定等殺之邊釁復起朝議以諤生  
事欲棄綏誅諤陝西宣撫主管機宜文字趙鼎言虜  
既殺王官而又棄綏不守示弱已甚且名山舉族來  
歸當何以處又移書執政請存綏以張兵勢規度大  
理河川建堡以處降者不從乃命韓琦判永興軍經  
略陝西琦初言綏不當取及楊定等被殺復言綏不  
可棄樞密以初議詰之琦具論其故卒存綏州時言

者交論种諤乃下吏貶其官

宋元通鑑

神宗熙寧二年春三月夏人乞綏州

二年三月戊子秉常上誓表納塞門安遠二砦乞綏

州詔許之

宋史种宗本紀

冬十月城綏州

十月丙申城綏州命郭逵選將置守具逵遣趙鼎交

夏人所納安遠塞門二砦就定地界夏人渝初盟禹

請城綏州不以易二砦改名綏德城

宋史种宗本紀种諤取



綏州夏人欲以塞門安遠二砦來易朝廷許之達曰  
此正商於六百里之策也非先交二砦不可與遣其  
屬趙高薛昌朝與夏使議唯言砦基高曰二砦之北  
舊有三十六堡且以長城嶺為界西平王祥符所移  
書固在也虜使驚不能對乃寢其請初詔焚棄綏州  
達匿而不下至是帝問大臣皆莫知達始自劾向者  
違詔旨之罪帝手詔褒答

郭達傳

三年秋八月夏人入寇屯榆林詔韓絳宣撫陝西

夏人大舉入寇攻城堡兵多者號二十萬少者不下  
一二萬屯於榆林韓絳請行邊乃以絳為陝西宣撫  
使授以空名告敕得自除吏

宋史夏  
國傳

冬十月詔延州絕夏使

熙寧三年冬十月辛酉詔延州毋納夏使

宋史神  
宗本紀

四年春正月种諤襲夏人敗之

韓絳素不習兵開幕府於延安措置乖方選蕃兵為  
七軍復以种諤為鄜延鈐轄知青澗城信任之命諸

將皆受其節制蕃兵皆怨望諤謀取橫山帥師襲敗  
夏人於囉兀因以衆二萬城焉自是夏人日聚兵為  
報復計呂公弼言諤稔邊患不便宜戒之弗聽已而  
絳言諤入夏之功乞加旌賞詔從之

宋元通鑑

### 三月夏人陷撫寧諸城

种諤進築永樂川賞逋嶺二砦分遣都監趙璞燕達  
築撫寧故城及分荒堆三泉吐渾川開光嶺葭蘆川  
四砦已而夏人來攻順寧砦遂圍撫寧折繼昌高永

能等擁兵駐細浮圖去撫寧咫尺囉兀兵勢尚完諤  
在綏德節制諸軍聞夏人至茫然失措欲作書召燕  
達戰悸不能下筆顧運判李南公涕泗不已於是新  
築諸堡悉陷將士千餘人皆沒初朝議以新囉兀城  
去綏德百餘里偏梁險狹難於餉饋且城中無井泉  
遣李評張景憲往視之未至而撫寧陷遂詔棄囉兀  
城五月燕達以戍卒輜重歸自囉兀為夏人邀擊達  
多亡失

宋史夏  
國傳

秋九月夏人來輸平不許

九月夏人遣使入貢且以二砮易綏州乞如舊約詔

不允

宋史夏國傳

九年冬沈括治兵延州

沈括知延州至鎮悉以別賜錢為酒命廛市良家子

馳射角勝有軼羣之能者自起酌酒以勞之邊人驩

激執弓傳矢唯恐不得進越歲得徹札超乘者千餘

補中軍義從威聲雄他府

宋史沈括傳

元豐二年秋八月夏人寇綏德城

元豐二年八月丙申朔夏人寇綏德城都監李浦敗

之

宋史神  
宗本紀

秋九月綏德將楊永慶出境擅殺詔編管之

元豐二年九月綏德把截楊永慶聲徼循邊而掩取  
蕃部首級詐言斬犯邊人詔毀永慶出身文字送西

京編管

宋史夏  
國傳

四年秋九月种諤及夏人戰於無定川敗之

种諤上言夏主秉常為其母所囚可急引本路兵擣其巢穴遂入對大言曰夏國無人秉常孺子往持其臂以來耳帝壯之決意西討以為經略安撫副使諸將悉聽節制諤即次境上帝以諤先期輕出使聽令於王中正敵屯兵夏州諤率本路並畿內七將兵攻米脂三日未下夏兵八萬來援諤禦之無定川伏兵發斷其首尾大破之降守將令介訛遇捷書聞帝大

喜遣中使諭獎

宋史种諤傳

五年春三月廊延擊夏人敗之夏四月進屯綏德城

三月壬寅廊延路副總管曲珍敗夏人於金湯夏四月己未沈括奏遣珍將兵綏德城應援討葭蘆塞左

右見聚羌落詔從之

宋史神宗本紀

夏五月豐州卒作亂討平之

五月豐州卒張世矩等作亂伏誅

宋史神宗本紀

秋八月給事中徐禧護兵城永樂

沈括請城古烏延城以包橫山使夏人不得絕沙漠



遂遣侍中徐禧內侍李舜舉往議禧復請於銀夏宥之界築永樂城永樂依山無水泉獨种諤極言不可禧率諸將竟城之賜名銀川砦禧等還米脂以兵萬

人屬曲珍守之

宋史夏國傳

九月夏人陷永樂徐禧等敗死

永樂接宥州附橫山夏人必爭之地禧等既城去九日夏人來攻珍使報禧乃挾李舜舉來援而夏兵至者號三十萬禧登城西望不見其際宋軍始懼翌日

夏兵漸逼禧乃以士萬陣城下坐譙門執黃旗令衆曰視吾旗進止夏人縱鐵騎渡河或曰此號鐵鷄子當其半濟擊之乃可有逞得地則其鋒不可當也禧不聽鐵騎既濟震盪衝突大兵從之禧師敗績將校寇偉李思古高世才夏儼程博古及使臣十餘輩士卒八百餘人盡沒詔李憲張世矩往援及令括遣人與約退軍當還永樂地夏人進侵及縣門潰歸城者決水砦為道以登夏人因之奔歸於城者三萬人皆

沒夏兵圍之者厚數里遊騎掠米脂將士晝夜血戰  
城中乏水已數日鑿井不得泉渴死者大半括等援  
兵及餽運皆為夏大兵所隔夏人呼珍來講和呂整  
景思義相繼而行夏人髡思義囚之而城圍者已浹  
旬矣夜半夏兵環城急攻城遂陷高永能戰沒禧舜  
舉運使李稷皆死於亂兵惟曲珍王湛李浦呂整裸  
跣走免蕃部指揮馬貴獨誓死持刀殺數十人而沒  
是役也死者將校數百人士卒役夫二十餘萬夏人

乃耀兵米脂城下而還

宋史夏國傳

六年春三月將軍薛義等擊夏人連破之

三月河東將薛義敗夏人於葭蘆西嶺麟府州將郭

忠詔等敗夏人於乜離抑部河東將高永翼敗夏人

於真卿流部

宋史神宗本紀

夏六月夏人寇麟州州兵擊敗之

夏人寇麟州神堂砦知州訾虎躬督兵出戰敗之詔

虎自今毋得輕易出入遇有寇邊止令裨將出兵捍

遂恐失利損威以張虜勢

宋元通鑑

七年夏四月夏人寇延州州將擊敗之

元豐七年夏四月癸巳夏人寇延州安塞堡將官呂

真敗之

宋史神宗本紀

八年春三月夏人寇葭蘆

元豐八年三月夏人攻葭蘆供奉王英戰死

宋史夏國傳

哲宗元祐元年春正月汰陝西增置官

元祐元年正月罷陝西元豐四年後凡緣軍興添置

官局

宋史哲  
宗本紀

秋七月夏人遣使求米脂等砦

初秉常遣訛囉聿求米脂等五砦神宗不許及帝即位秉常復遣訛囉聿來請司馬光言此乃邊鄙安危之機不可不察今若靳而不與彼必以為恭順無益兵連不解願決聖心為兆民計文彥博與光合將許之會秉常卒遣使來告哀詔自元豐四年用兵所得城砦待歸我陷執民當盡以給還

宋史西  
夏傳

四年夏六月來歸永樂之俘

四年六月稍歸永樂所獲人遂以米脂葭蘆浮圖

浮圖

在綏德州南

安疆四砦與之而畫界未定

宋史夏國傳

六年夏六月夏人入寇廊延都監李儀死之

六年九月圍麟府三日殺掠不計廊延都監李儀等

盡沒

宋史西夏傳

八月詔李儀等以違旨夜出兵入界與

夏人戰死不贈官餘官降等閏月嚴飭陝西諸路邊

備九月詔州民為寇所掠廬舍焚蕩者給錢帛踐稼

金史卷八十一  
者振之失牛者官貸市之

宋史哲宗本紀

七年春二月詔陝西嚴邊防

元祐七年二月丁卯詔陝西邊要進築守禦城砦

宋史

哲宗本紀

冬十月募民守前代帝王陵廟

元祐七年冬十月丁巳陝西有前代帝王陵廟處給

民五家充守陵戶

宋史哲宗本紀

紹聖三年冬十月夏人寇廊延陷金明砦



紹聖三年冬十月壬戌夏人寇鄜延陷金明砦戊辰

詔被邊諸路相度城砦要害增嚴守備

宋史哲宗本紀

三年

九月大入鄜延西自順寧招安砦東自黑水安定中

自塞門龍安金明以南二百里間相繼不絕至延州

北五里十月忽自長城一日馳至金明列營環城國

主子母親督桴鼓縱騎四掠知麟州有備復還金明

而後騎之精銳者留龍安邊將悉兵掩擊不退金明

乃破守兵二千八百人惟五人得脫城中糧五萬石

草千萬束皆盡將官張興死之

夏國傳

四年夏人寇綏德城及麟州

紹聖四年二月丙寅夏人寇綏德城三月夏人犯麟

州神堂堡出兵討之進築胡山砦

宋史哲宗本紀

元符元年夏六月遣使巡視廊延新城

元符元年六月丙戌遣官分詣廊延按驗所築城砦

宋史哲宗本紀

二年春正月廊延兵擊夏人敗之

元符二年二月戊子鄜延鈐轄劉安敗夏人於神堆

宋史哲  
宗本紀

三月府州獲夏將

三月知府州折克行獲夏國鈐轄令王皆保

宋史哲  
宗本紀

夏五月築鄜延路金湯城

五月庚戌築鄜延路金湯城

宋史哲  
宗本紀

徽宗崇寧四年春三月復銀州

三月復銀州是月夏人攻塞門砦

宋史徽  
宗本紀

夏四月夏人寇順寧廊延兵敗之

崇寧四年夏四月己丑夏人寇順寧砦廊延第二副

將劉延慶擊破之

宋史徽宗本紀

欽宗靖康元年冬十月遼故將陷建寧砦

靖康元年十月遼故將小呼魯攻陷麟州建寧砦知

砦楊震死之

宋史欽宗本紀

十一月詔陝西宣撫范致虛督兵勤王不克而還

靖康元年十一月以京兆府路安撫使范致虛為陝

西五路宣撫使令督勤王兵入援

宋史欽宗本紀

致虛會陝

西節制錢蓋師凡十萬入援致虛勇而無謀以僧趙

宗印為參議官委已以聽於宗印宗印徒大言實未

嘗知兵師出武關金將羅索以精騎衝之不戰而潰

致虛收餘兵入潼關

范致虛傳

高宗建炎元年秋七月史斌襲據興州

建炎元年七月關中賊史斌犯興州僭號稱帝

宋史高宗

本紀

二年

金太宗天會六年

秋九月金兵犯永興守將賀師範戰死

九月甲午金人再犯永興軍經略使郭瑛棄城退保

義谷辛丑陝西節制司兵官賀師範及金人戰於八

公原敗績死之

宋史高宗本紀

王庶節制陝西六路軍馬授

端吉州團練使充節制司都統制端雅不欲屬庶九

月金人攻陝西庶召端會雍耀間端辭以未受命庶

以廊延兵先至龍坊端又稱已奏乞回避席貢別遣

統制官龐世才將步騎萬人來會庶無如之何則檄

貢勒端還舊任遣陝西節制司將官賀師範趨耀別  
將王宗尹趨白水且令原慶出師為援三帥各遣偏  
將劉仕忠寇輝來與師範會庶欲往耀督戰已行會  
龐世才兵至邠端中悔以狀白庶言已赴軍前庶乃  
止師範輕敵不戒卒遇敵於八公原戰死二將各引  
去端遂得涇原兵柄

曲端傳

冬十一月吳玠襲史斌於長安斬之

史斌圍興元不克引兵趨關中義兵統領張宗誘斌

還長安欲徐圖之曲端怒宗遣玠襲斬斌而自襲宗

殺之

通鑑

三年冬十月張浚治兵興元

十月戊戌張浚治兵於興元

宋史高宗本紀

公抵興元奏曰

竊見漢中實天下形勢之地臣頃侍帷幄親聞玉音

謂號令中原必基於此臣所以不憚萬里捐軀自効

庶幾奉承聖意之萬一謹於興元理財積粟以待巡

幸願陛下鸞輿早為西行之謀前控六路之師後據



兩川之粟左通荆襄之財右出秦隴之馬天下大勢  
斯可定矣始公未至敵已陷鄜延鄜延帥郭浩寄治  
德順軍敵驍將羅索貝勒引大軍渡渭河犯永興知  
軍郭瑛遁去敵兵四掠而諸帥方互結仇怨不肯相  
援人心皇皇公到纔旬日即出行關陝復奏請早決  
西來之期以繫天下心至陝訪問風俗罷斥姦賊而  
尤以搜攬豪傑為先務一時氣義拳勇之士爭集麾  
下吳玠及其弟璘素負才略求見公願自試公與語

奇之時玠方修武郎璘尚副尉公獎予不次擢用命  
玠為統制璘領帳前親兵皆感激誓以死報諸帥亦  
惕息聽命會謀報敵將寇東南公即命諸將整軍向  
敵知敵既北還乃復還興元

朱子張魏  
公行狀

四年

金天會  
八年

秋八月復永興軍

張浚治軍入衛金人北歸復還關陝時金帥烏珠猶  
在淮西浚懼其復擾東南謀牽制之遂決策治兵合  
五路之師以復永興金人大恐急調烏珠等由京西

入援大戰於富平軍潰退保興州

宋史張浚傳按富平之戰耀州鳳

翔復降於金

冬十一月盜桑仲犯金州王彥擊敗之

王彥知金州時盜賊蠭起加以饑饉無所資食惟蜀富饒巨盜往往窺覬桑仲既陷均房遂乘勝直擣金州白土關衆號三十萬仲彥舊部曲也以申牘請於彥曰仲於公無敢犯願假道入蜀就食耳彥遣統領閔立為先鋒擊之賊銳甚立戰死將士失色或請避

之彥叱曰樞相張公方有事關陝若仲越金而至梁  
洋則腹背受敵大事去矣敢言避者斬即勒兵阻水  
據山設伏以待賊見官軍少蟻附搏戰彥執幟一麾  
士殊死鬪賊敗走

宋史王  
彥傳

張浚遣吳玠守和尚原以拒金

公退保興州時陝右兵散各歸本路宣撫司獨親兵  
實從官屬有獻議退保夔州者公堅駐不動以拒敵  
衝獨叅議劉子羽毅然與公意合迺劾異議者遣子

羽出關召諸將收散亡將士知宣司在興州皆相率  
會子羽於秦亭凡十餘萬公哀死問傷錄善咎已人  
心悅焉迺命吳玠取涇原兵據高扼險於鳳翔之和  
尚原守大散關斷賊來路命關師古等聚熙河兵於  
岷州大潭一帶命孫渥賈世方等聚涇原鳳翔兵於  
階成鳳三州以固蜀口敵見備禦已定輕兵至輒敗  
不敢近公上䟽待罪上手書報公曰卿便宜收合夷  
散養銳待時但能據險堅壁謹守要害既以保固四

川之地又能牽制南下之師則惟卿之賴公奉詔益

厲諸將嚴備待敵

朱子張魏公浚行狀

劉子羽叅御營使軍事

張忠獻公浚與敵遇戰不利退保興州官屬有建策

徙治夔州者公叱之曰孺子可斬也四川全盛敵欲

入寇久矣直以川口有鐵山棧道之險耳今不堅守

縱使深入而吾乃僻處夔峽遂與關中聲援不復相

聞進退失計悔將何及今幸敵方肆掠未逼近郡宣

司但當留駐興州外繫關中之望內安全蜀之心急

遣官屬出關呼召諸將收集散亡分布險隘堅壁固壘觀釁而動庶幾猶或可以補前愆續後咎奈何乃為此言乎張公然公言而諸叅佐無敢行者公即自請奉命北出復以單騎至秦州分遣腹心召諸亡將諸亡將聞命大喜悉以其衆來會公命驍將吳玠柵和尚原守大散關而分兵悉守諸險塞敵諜知我有

備引去

朱子劉子羽神道碑按和尚原在今鳳縣

紹興元年

金天會元年

春正月金兵攻商州統制張玘擊却

之

董先為制置司玘佐之紹興元年金將高瓊率眾取  
商州董先禦之玘乘銳奔擊從騎不能屬單馬至四  
皓廟金兵數百騎至玘瞋目大呼挺刃突擊金兵披  
靡莫敢向是日九戰九捷追至試劍關爭門蹂踐死

者百人

宋史張  
玘傳

三月金兵徧興州

金人破福津蹂同谷以迫興州浚遂退保閬州而以



王庶為制置使節制陝西諸路知興元府

通鑑

夏四月金兵犯耀州擊却之

夏四月己卯金涇原帥趙彬犯耀州守臣趙澄擊走

之是月京西賊李忠陷商州

宗史高  
宗本紀

秋九月李忠寇金州王彥擊敗之

九月權京西南路副總管李忠反據京西遂攻金州

諸關賊衆皆河朔人驍果善戰彥與戰不利關陷彥  
退屯秦郊令將士盡伏山谷間焚秦郊積聚偽若遁

者秦郊距郡城二十里路坦夷彥募敢死士易麾幟設奇以待閱再宿賊至秦郊官軍逆戰大敗之追襲至秦嶺遂復乾祐縣以歸忠走降劉豫

宋史王彥傳

冬十月金兵攻和尚原吳玠及其弟璘禦却之

玠保和尚原積粟繕兵列柵為死守計或謂玠宜退守漢中扼蜀口以安人心玠曰我保此敵決不敢越我而進是所以保蜀也金將摩哩自鳳翔鄂拉扎哈自階成出散關約日會和尚原鄂拉扎哈先期至陣

北山索戰玠命諸將堅陣待之更戰迭休山谷路狹  
多石馬不能行金人舍馬步戰大敗移砦黃牛會大  
風雨電遂遁去摩哩方攻箭箬關玠復遣將擊退之  
兩軍終不得合金人與玠戰輒北憤甚謀必取玠羅  
索死烏珠會諸道兵十餘萬造浮梁跨渭自寶鷄結  
連珠營壘石為城夾澗與官軍拒攻和尚原玠命諸  
將選勁弓強弩分番迭射號駐隊矢連發不絕繁如  
雨注敵稍却則以奇兵旁擊絕其糧道度其困且走

設伏於神全以待金兵至伏發衆大亂縱兵夜擊大  
敗之烏珠中流矢僅以身免烏珠敗歸復以薩里罕  
為陝西經略使屯鳳翔與玠相持

宋史吳玠傳

箭箬關之

戰斷摩哩與鄂拉扎哈兵使不得合璘功居多

吳璘傳

十二月桑仲寇金州王彥擊破之

初桑仲既敗還襄陽乃鳩集散亡陷鄧州山焰復熾  
分衆三道一攻注口關一出馬郎嶺一擣洵陽前軍  
去金州不三十里彥曰仲以我寡彼衆故三分道以

離吾勢法當先破其堅則脆者自走遣副將焦文通

禦注口自以親兵營馬郎相持一月大戰六日賊大

敗仲為其下所殺

宋史王彥傳

二年

金天會十年

春三月金兵攻方山原不克

三月金人攻方山原陝西統制楊政援之金兵引去

宋史高宗本紀

方山原在今漢陰西三十里按雍勝畧

夏五月張浚以劉子羽守興元

紹興二年五月張浚以叅軍事劉子羽知興元府

宋史

高宗本紀

宣撫司移軍閬州公請獨留關外調護諸將以

通內外聲援軍民之心翕然向之漢中大饑諸帥閉境自守因有違言皆願得公與連兵張公承制可其

請公至鎮開關通商輸粟輯睦隣援飭兵練卒柵險

待敵

朱子劉子羽神道碑

秋九月詔曲赦陝西叛將

紹興二年九月辛酉以彗出赦陝西諸叛將許令自

新

宗史高宗本紀

三年

金天會十一年

春二月金攻饒風關劉子羽吳玠兵潰金

兵入興元子羽玠還擊破之

二月吳玠遇金人於饒風關王彥自西鄉來會金人  
分兵攻關統制郭仲敗走丁酉饒風關破玠趨西鄉  
彥奔達州金師入興元經略使劉子羽焚其城走三  
泉縣吳玠退屯仙人關金兵復深入至金牛鎮疑有  
伏由褒斜谷引兵還興元吳玠劉子羽追擊其後殺  
獲甚衆

宋史高宗本紀

時吳玠為秦鳳經略使公聞彥失守

亟移兵守饒風嶺且以語玠玠大驚即越境而東日  
夜馳三百里中道少止請公會西縣計事公報曰敵  
旦夕至饒風下不亟守此是無蜀也公不前吾當往  
今又西走不知者謂吾懼而逸爾諸將得無解體乎  
玠得書即復馳至饒風列營拒守敵人悉力仰攻死  
傷如積更募死士由間道犯祖溪關一統志祖溪關在饒風嶺北四  
十里以入繞出玠後玠遽走還漢中且來邀公欲與俱  
去公不可留玠先柵定軍山以守玠不可公不得已



退守三泉從兵不及三百人與士卒同粗糲至取草  
牙木甲噉之遺玠書與訣玠持之泣下欲馳赴公未  
果其愛將楊政者大呼軍門曰公今不行是負劉公  
政輩亦且舍公去矣玠乃來會三泉時敵游騎甚迫  
玠夜不寐起視公方甘寢自若遽起公請曰此何等  
時而簡易若是公慨然曰吾死命也亦何言玠慙嘆  
泣下竟不果留公以譚毒山形陡拔其上寬平有泉  
水乃築壘守之儲粟十餘萬石盡徙將士家屬柵中

積石數十百萬下臨走蜀道數日敵果至營數十里  
間一夕候騎報金大軍且至諸將皆失色入問計公  
曰始與公等云何今寇至欲避耶下令蓐食遲明上  
馬先至戰地前當山角據胡床坐諸將追及泣請曰  
某輩乃當致死於此非公所宜處也公不為動敵知  
不可攻亦引退入梁洋蜀中復大震宣撫使官屬爭  
咎公更為浮言相恐動力謂張公徙治潼川令下軍  
士憤怒或取其榜毀之公以書力為張公言此已為

死守敵必不敢越我而南藉令不能守我死行未晚也今一旦輕動若此兵將忿怒恐將有齟齬公墳墓者奈何張公發書大悟立止不行敵遣十餘人持書與旗來招公及玠公斬之餘一人使還曰為我語羣盜欲來即來吾有死耳何可招也因復與玠謀出銳師腹背擊之未及期而敵已遁矣盖方敵未至公已悉徙梁洋官私之積置他所敵既深入無所得而糧日匱前後苦攻死傷十五六又聞公之將襲已也懼

故遁公亟遣兵追擊之墮谿谷死者不可計其餘衆不能自拔者猶數十柵皆降之是時金大帥薩里罕烏珠輩主兵用事計必取蜀以窺東南其選募戰攻盖已不遺餘力而我之謀臣戰將亦無敢為必守計者獨公與張公協心戮力毅然以身當兵衝將士視公感激爭奮卒全蜀境

朱子劉子羽神道碑按饒風關在今石泉縣西五十里

夏五月王彥復金州

紹興三年五月丙子王彥復金州

宗史高宗本紀

五月彥遣

兵至漢陰縣與劉豫將周貴戰大敗之復金州

王彥傳

四年

金天會十二年

春三月吳玠吳玠及金人戰於仙人關敗

之

先是璘守和尚原饋餉不繼玠又謂其地去蜀遠命璘棄之經營仙人關右殺金平剏築一壘移原兵守之至是烏珠薩里罕及劉夔率十萬騎入侵自鐵山鑿崖開道循嶺東下玠以萬人當其衝璘率輕兵由七方關倍道而至與金兵轉戰七晝夜始得與玠合

敵首攻玠營玠擊走之又以雲梯攻壘壁楊政以撞竿碎其梯以長矛刺之璘拔刀畫地謂諸將曰死則死此退者斬金分軍為二烏珠陣於東韓常陣於西璘率銳卒介其間左繞右縈隨機而發戰久璘軍少憊急屯第二隘金生兵踵至人被重鎧鐵鈎相連魚貫而上璘以駐隊矢迭射矢下如雨死者層積敵踐而登薩里罕駐馬四視曰吾得之矣翌日命攻西北樓姚仲登樓酣戰樓傾以帛為繩挽之復正金人用

火攻樓以酒缶撲滅之玠急遣統領田晟以長刀大  
斧左右擊明炬四山震鼓動地明日大出兵統領王  
喜王武率銳士分紫白旗入金營奮擊射韓常中目  
金人始宵遁玠遣統制張彥刼橫山砦王俊伏河池  
扼歸路又敗之是役也金自元帥以下皆攜孥來劉  
夔乃豫之腹心本謂蜀可圖既不得逞度玠終不可  
犯則還據鳳翔

宋史吳玠傳 按仙人關在鳳縣西南

七年冬十月廊延故將李顯忠謀來歸不克奔夏

顯忠綏德青澗人自唐以來世襲蘇尾九族巡檢顯忠年十七隨父永奇出入行陣金人陷延安授永奇父子官永奇聚泣曰我宋臣也世襲國恩乃為彼用耶會劉豫令顯忠帥馬軍赴東京永奇戒之曰汝若得乘機即歸本朝無以我故貳其志事成我亦不朽矣顯忠至東京乃密遣客雷燦以蠟書赴行在已而豫廢烏珠授顯忠知同州顯忠至鄜省侍永奇教顯忠曰同州入南山乃金人往來驛路汝可於此擒其



酋渡洛渭由商號歸朝第報我知我當以兵取延安而歸顯忠赴同州即遣黃士成等持書由蜀至吳報歸朝事元帥薩里罕來同州顯忠以計執之馳出城至洛河舟船後期不得渡與追騎屢戰皆勝顯忠憩高原望追騎益多乃與薩里罕折箭為誓不得殺同州人不得害我骨肉皆許之遂推之下山崖追兵爭救得免顯忠攜老幼長驅而北至郿城縣急遣人告永奇永奇即挈家出城至馬翅谷口為金人所及家

屬二百口皆遇害顯忠僅以二十六人奔夏

宋史李顯忠傳

九年春正月李顯忠以夏軍至延安

顯忠奔夏夏人問故顯忠泣具言父母妻子之亡切齒疾首願得二十萬人生擒薩里罕取陝西五路歸於夏已亦得報不共戴天之讐夏主曰爾能立功則不靳借兵時有酋豪號青面夜叉者久為夏國患顯忠請三千騎馳至其帳擒之夏主大悅即出二十萬騎以文臣王樞武臣啜訛為陝西招撫使顯忠為延

安招撫使

宋史李顯忠傳

二月遣使者宣諭陝西

紹興九年二月癸丑以徽猷閣待制周聿為陝西宣

諭使戊午以知金州郭浩為陝西宣撫判官己巳以

郭浩為陝西宣諭使

宋史高宗本紀

三月金以陝西地來歸

三月王倫受地於金得陝西地

宋史高宗本紀

夏四月命樓炤宣諭陝西陝西叛將來歸復委用之

夏四月辛亥命樓炤宣諭陝西壬午金廊延路經略使關師古上表待罪命知延安府癸丑金陝西諸路節制使張中孚上表待罪命知永興軍節制陝西諸

路軍馬

宗史高  
宗本紀

五月李顯忠自夏來歸

顯忠至延安總管趙惟清大呼曰廊延路今復歸宋矣已有赦書顯忠與官吏觀赦書列拜大哭乃以舊部八百餘騎往見王樞喟訛諭之曰顯忠已得延安

府見講和赦書招撫可以本部軍歸國嘑訛不從曰  
初經略乞兵來取陝西今既到此乃令我歸耶顯忠  
知勢不可乃出刀斫嘑訛不及擒王樞縛之夏人以  
鐵鷄子軍來顯忠以所部却之馳揮雙刀所向披靡  
夏兵大潰殺死蹂踐無慮萬人獲馬四萬匹顯忠揭  
榜招兵每得一人予馬一匹旬日間得萬人皆驍勇  
又擒害其父母弟姪者皆斬於東城之內行至鄜州  
有馬步軍四萬餘薩里罕在耀州聞顯忠來一夕遁

去吳玠遣張振來撫諭曰兩國見議和好不可生事  
可量引軍赴行在遂至河池縣見玠玠撫之曰忠義  
歸朝惟君第一至行在高宗撫勞再三賜名加賚

宋史

李顯  
忠傳

十年

金熙宗天  
眷三年

夏五月金兵圍耀州

五月辛丑金人犯鳳翔之石壁砦吳璘遣統制姚仲  
等拒卻之金人圍耀州郭浩遣兵救之金兵解去

宋史

高宗  
本紀

六月吳璘敗金人於扶風復其城

吳璘節制陝西諸軍璘以書遺金將約戰金呼紐郎君以三千騎衝璘軍璘使李師顏以驍騎擊走之呼

紐入扶風復攻拔之獲三將及女真百十有七人薩

里罕怒甚自戰百通坊列陣二十里璘遣姚仲力戰

破之

宋史吳璘傳

六月己未郭浩遣統制鄭建充攻破金

人於醴州復其城

高宗本紀

閏六月金兵入邠州王彥等擊敗之

薩里罕與吳璘楊政夾渭河而陣璘駐兵大壘嶺薩里罕覘之曰善戰者立於不敗之地此難與爭乃引去趨邠州田晟遣將拒之於青谿嶺胡世將又遣王彥楊從儀分道而出屢戰敗之薩里罕還屯鳳翔通鑑六月己丑永興軍鈐轄傅忠信等與金人戰於華陰

縣敗之

宋史高宗本紀

秋七月金兵犯永興盤屋擊却之

秋七月庚戌永興軍統領辛鎮及金人戰於長安城



下敗之金人犯盤屋縣王俊逆戰於東洛谷郤之

宋史

高宗  
本紀

八月敗金兵於汧陽

八月甲午川陝宣撫司統領王喜等遇金人於汧陽

縣敗之

宋史高  
宗本紀

九月統制楊從儀襲敗金兵於鳳翔

九月丁未楊政遣統制楊從儀夜襲金人於鳳翔府

敗之

宋史高  
宗本紀

冬十一月金兵犯寶雞

十一月金兵犯寶雞縣統制楊從儀敗之

宗史高本紀

十一年

金皇統元年

春正月楊從儀擊金兵渭南敗之

正月癸卯鳳翔統制楊從儀敗金人於渭南

宗史高本紀

金兵陷商州

正月戊辰金人陷商州守臣邵隆棄城去二月邵隆

破金人於洪門復商南

通鑑

秋九月諸將收復陝西

九月壬子楊政克隴州破岐下諸屯郭浩復華州

宋史

高宗本紀

冬十月楊政及金人戰寶雞敗之

十月戊辰楊政及金人戰於寶雞縣敗之擒通吉貝

勒

宋史高宗本紀

楊政敗金萬戶通吉於寶雞時通吉居渭

北政欲攻拔其城通吉將精甲萬衆出政帥勇士鏖

戰遣裨將突出陣後登山執幟金軍見之大呼曰伏

發矣乃驚潰政乘勝掩殺通吉走至城門而橋已絕

遂擒之和議成帝召政還

楊政傳

十二月金人來求商州之地詔割其半以畀之

烏珠遣使來求商州及和尚方山二原遂命周聿鄭剛中分畫商秦之半以畀金國止存上津豐陽棄和尚方山二原以大散關為界初邵隆在商州十年披荆榛瓦礫以為治招徠流散屢敗金人終不肯離商而去值和議成割商與金隆常怏怏徙知金州嘗以兵出敵境秦檜陰使人酖之

宋元通鑑

十六年

金皇統六年

春二月詔以商州地予金

紹興十六年二月割豐陽乾祐縣界金人

宋史高宗本紀

三十一年

金主亮正隆六年

秋九月金兵攻黃牛堡吳璘等敗

之

圖克坦喀齊喀將五千騎扼大散關遊騎攻黃牛堡守將李彥堅告急人情洶洶制置使王剛中跨一馬馳二百里至吳璘營起璘於帳中責之曰大將與國義同休戚臨敵安得高枕而卧璘大驚即馳至殺金平

駐軍青野原益調內郡兵分道而進授以方略以援  
黃牛剛中又以蠟書抵張正彥濟師西師大集李彥  
堅以神臂弓射金師却之璘遣別將彭青至寶雞渭  
河夜刼橋頭寨破之遂復隴州

通鑑

冬十月復商州

十月丙辰金州都統制王彥遣統制任天錫出洵陽  
復豐陽縣戊午任天錫復商洛縣命吳璘趨出兵漢  
中已未任天錫復商州執其守將完顏守能

宗史高  
宗本紀

三十二年

金世宗大定二年

春閏二月吳璘復大散關

閏二月吳璘遣楊從儀等攻拔大散關分兵據和尚

原金人走寶雞

宋史高宗本紀

冬十二月吳璘拒金兵於鳳翔詔璘班師

金以重兵扼鳳翔爭吳璘新復十三州三軍璘亟馳

德順以備之已而金富察世傑率師十萬來攻璘力

戰拒之時議棄三路遂詔璘班師

通鑑

寧宗開禧二年

金章宗泰和六年

陝西安撫使吳曦叛降於金

曦既得志與其從弟晁及徐景望趙富米修之董鎮共為反謀陰遣其客姚淮源獻關外階成和鳳四州

於金求封蜀王

宗元通鑑

五月興元軍亂

開禧二年五月興元都統秦世輔出師至城固縣軍

大亂

宋史寧宗本紀

宣撫使程松棄興元歸

先是以程松為四川宣撫使吳曦副之松移司興元



金完顏綽哈攻鳳州松求援於吳曦曦給言當發三千騎往松信不疑及曦受金詔宣言金使者欲得階成和鳳四州以和馳書諷松使去松不知所為會報金兵至百姓奔走相蹂躪松急趨米倉山而遁以書抵曦勾瞞禮稱曦為蜀王曦封致餽松望見大恐疑為劍急逃奔使者追與之乃金寶也松受而兼程出

峽西向掩淚曰吾今始獲保頭顱矣

宋元通鑑

三年

金泰和七年

春正月吳曦僭王位於興州權大安軍楊

震仲死之

曦遣將利吉引金兵入鳳州以四郡付之表鐵山為

界曦乘黃屋左纛僭王位於興州即治所為行宮

宋史

吳曦傳

楊震仲權大安軍吳曦叛素聞震仲名馳檄召

之震仲辭疾不行曦遣郭鵬飛趣其行益急震仲飲

毒死監郡為之流涕

楊震仲傳

二月興州將李好義等討吳曦誅之

監興州合江倉楊巨源謀討吳曦乃陰與曦將張林

朱邦寧及忠義士朱福等深相結眉州人程夢錫知之以告轉運使安丙丙稱疾未視事乃屬夢錫以書致巨源延之卧所巨源曰先生而為逆賊丞相長史耶丙號哭曰目前兵將我所知不能奮起必得豪傑乃滅此賊巨源曰非先生不足以主此事非巨源不足以了此事會興州中軍正將李好義亦結軍士李貴進士楊君玉李坤辰李彪等數十人謀誅曦好義曰此事誓死報國但曦死後若無威望者鎮撫恐一

變未已一變復生欲奉安丙主事使坤辰來邀巨源  
與會巨源往與約還報丙丙出視事君玉與白子申  
共草密詔乙亥未明好義率其徒七十四人入偽宮  
時偽宮門洞開好義大呼而入曰奉朝廷密詔以安  
長史為宣撫令我誅反賊敢抗者夷其族曦衛兵千  
餘聞有詔皆棄挺而走巨源持詔乘馬自稱奉使入  
內戶曦啓戶欲逸李貴即前執之刃中曦頰曦反撲  
貴仆於地好義急呼王煥斧其腰曦始縱貴貴遂斫

其首持告丙宣詔軍民拜舞聲動天地持曦首撫定

城中市不易肆盡收曦黨殺之

通鑑續編

三月興州將李好義等復秦鳳等州及大散關

楊巨源李好義謂安丙曰關外四州為蜀要害盍乘勢復取之不然必為後患丙從之於是分遣好義等

復西和階成鳳州孫忠銳復大散關

宋元通鑑

四月金人

復破大散關

宋史寧宗本紀

夏六月安丙殺叅議官楊巨源

初吳曦誅獎諭詔至沔州巨源謂人曰詔命一字不及巨源疑有以蔽其功者俄報王喜授節度使而巨源僅與通判心益不平乃愬功於朝或謂安丙曰巨源謀亂丙令喜鞫其黨皆抵罪時巨源方與金人戰於鳳州之長橋丙密使興元都統制彭輅收巨源械送閬州獄至大安龍尾灘丙使將校樊世顯取刀斷其頭不絕者踰寸遂以巨源自殪聞忠義之士聞者

莫不扼腕流涕

宋元通鑑

嘉定元年

金泰和八年

夏六月金以大散關來歸

六月庚午金人歸大散關

宋史寧宗本紀

二年冬十一月沔州將張林等謀作亂

嘉定二年十一月辛卯朔沔州統制張林等謀作亂

事覺貸死除名廣南羈管

宋史寧宗本紀

十一年

金宣宗興定元年

春二月金兵陷大散關及皂郊三月

統制王逸將兵復之

二月甲辰金人焚大散關而去丙午破皂郊死者五

萬人三月戊子王逸率忠義人復皂郊金副統軍完顏禔包長壽遁去沔州軍郭雄追斬禔首長壽僅以

身免

宋史寧宗本紀

夏四月金兵破黃牛堡統制吳政拒却之

金兵合長安鳳翔之衆復犯大散關守將王立遁又犯黃牛堡吳政拒却之政至大散關執立斬之以徇

事聞進政三官

宋元通鑑

十二年

金興定三年

春二月金兵入興元洋州遣兵破之於



大安軍金人遁

嘉定十二年春正月甲午金人破鳳州守臣雷雲棄城去金人夷其城乙未興元都統吳政及金人戰於黃牛堡死之金人乘勝攻武休關二月癸卯金人破武休關興元都統李貴遁還利州路提刑權興元府事趙希皆棄城去丁未金人破興元府辛亥金人犯洋州守臣蔡晉卿遣兵拒之不克洋州破壬子沔州都統張威遣統制石宣等邀擊金人於大安軍大破

之金人遂去興元府丙辰金人去洋州三月癸酉金

人復入洋州焚其城而去

宋史寧  
宗本紀

三月興元軍士作亂

三月乙亥興元軍士權興等作亂閏月癸亥興元軍

士張福莫簡等作亂以紅巾為號

宋史寧  
宗本紀

十三年秋九月興元金州諸將取關中

嘉定十三年九月興元副都統陳立出大散關興元

統制田胄出子午谷金州副都統陳昱出上津

宋史  
寧宗

本紀

理宗端平二年冬十二月元兵入沔州殺知州高稼統制曹友聞救却之

稼在沔葺理創殘招集流散皆襁負歸之及數與蒙古力戰奇功甚多至是奎騰自鳳州入西川東路之師多敗遂擣西池谷距沔九十里吏民議退保大安稼言於制置使趙彥呐曰今日之事有進無退若能進據險地以身捍蜀敵有後顧必不深入若倉皇召

兵退守內地敵長驅而前蜀事去矣彥呐曰吾志也已而竟行留稼守沔蒙古自白水關入六股株距沔六十里沔無城依山為阻稼升高鼓譟盛旗鼓為疑兵彥呐至蜀口輟帳前總管李彥威以軍還沔召小校楊俊何璘以兵會又選精兵千人命王宣帥以助之已而蒙古大至何璘遁沔州遂陷衆擁稼出戶稼叱之不能止敵圍殺之彥呐聞稼死沔州破乃進屯青野原蒙古圍之曹友聞救之解其圍既而蒙古先

鋒汪世顯擣大安友聞又救之指麾甫畢蒙古大軍數萬突至友聞逆戰又敗之敵乃退友聞遂引兵扼

仙人關

宋元通鑑

三年秋九月曹友聞及元兵戰於陽平關死之

初友聞帥師扼仙人關諜報蒙古合蕃漢軍五十餘萬將至友聞謂弟萬曰國家安危在此一舉衆寡不敵豈容浪戰唯當乘高據險出奇設伏以待之蒙古攻武休關敗都統李顯忠軍遂入興元欲衝大安軍

制置使趙彥呐檄友聞控制大安以保蜀口友聞以  
為不可彥呐不從友聞乃遣弟萬及友諒引兵上雞  
冠隘多張旗幟示敵堅守友聞選精銳萬人夜渡江  
密往流溪設伏約曰敵至內以鳴鼓舉火為應外呼  
殺聲蒙古兵果至萬出迎戰蒙古巴圖魯及塔海帥  
步騎萬餘人往來搏戰矢石如雨萬身被數創令諸  
軍舉烽友聞分所部為三親帥精兵三千人疾馳至  
隘下先遣統領劉虎帥敢死士五百衝敵前鋒不動

友聞乃伏三百騎道傍而令虎銜枚突陣會大風雨  
諸將請曰雨不止淖濘深沒足宜俟少霽友聞叱曰  
敵知我伏兵在此緩必失機遂擁兵齊進西軍素以  
綿裹代鐵甲經雨濡濕不利步鬪黎明蒙古以鐵騎  
四面圍繞友聞嘆曰此殆天乎吾有死而已於是血  
戰愈厲與萬俱死軍盡沒蒙古兵遂長驅入蜀

宋元  
通鑑

陝西通志卷八十一